

Primiero cörta tli San Pöblo oquemejcuelfe TESALONICENSES

¹ Naja nePöblo. Naja ca tiehua Silvano hua Timoteo nemiechejcuelfea ini nönca cörta para nemejua tli nencate de inu grupo de creyentes de inu ciudad de Tesalónica, tli nencate tieinca Deus toTajtzi hua Tlöcatzintle Jesucristo. Ma xecpeacö tiefavur Deus hua neyulsiebelestle.

Creyentes ipa Tesalónica oyejyeya sente ejemplo para ocseque

² Seme tetietlasojcömatelea Deus por nemonochtie nemejua. Tetieyelfea yejuatzi de nemejua ipa totlajtlötla. ³ Pos tejua seme tequelnömetecate de lo que tli nenquechijque ipampa nemoneltoca, hua de quiene nentequetque lalebes ipampa nentietlasojtla Deus, hua de quiene nenquexicojtecate meyac söasantle ipampa nenquepea nemöchealestle tieitech toTlöcatzintle Jesucristo. De noche inu quematihuateca toTajtzin Deus. ⁴ Pos tejua tecmate que Deus nemiechtlasojtlalo, tocnihua, hua nemiechixpejpenque. ⁵ Tecmajmate de inu porque inu cuale tlamachestelestle tli tejua nemiechpubelejque amo ocalac ijtec nemoyulo sa de tlajtulme. Cache ocalac ca tiechecöhuales Espíritu Sönto, hua ca inu confiönsa de que inu tlamachestelestle ica melöhuac. Cuale nenquemajmate nemejua quiene tejua tecchihuaya nemotzölö. Ejqueu tecchihuaya por

nemopampa. ⁶ Hua nemejua nenquechijtecate lo que tli nenquejtaque de tejua hua nenquecajque de toTlöcatzintle. Pos nenqueselejque inu tlajtule ca meyac pöquelestle tli yejuatzi Espíritu Sönto nemiechmacaque, mös nenquesufrirojtaya. ⁷ De inu maniera ye nencate ejemplo para noche creyentes tli cate pa nemoestado de Macedonia hua nuyejque ipa estado de Acaya. ⁸ Pos tietlajtultzi Tlöcatzintle ye omacheac desde nemejua amo sa pa Macedonia hua Acaya, tlöcamo nuyejque ipa meyactie ocseque pörtes. Ye omacheac de nemoneltoqueles tli tieca Deus nенquepejpea. De manieras que tejua amo tecnesesitöra tequemelfisque ocseque creyentes de nemejua, ⁹ pos yejua mismos quepoa de quiene tejua teyajque nemotlac hua quiene nemejua nemoyulcuejque para nentietocaque Deus hua ayecmo nenquentocaque ixniehualojme. Hua toDeus öque öxö nentieneltocatecate, yejuatzi iloac Deus de melöhuac, hua nemoateca. ¹⁰ Nuyejque quepoa ocseque creyentes quiene nemejua nentiechixtecate tieConietzi Deus öque hualiloas de ompa elfecac, öque yejuatzi tieTajtzi tieyulebitiluc de intzölö mimejque. Yejuatzi iloac Jesús öque tiechmöquextilo de tiecualöneles Deus, tli yebitz ipan tlöltecactle.

2

Quiene otequet Pöbло ipa Tesalónica

¹ Pos nemejua nenquemate, tocnihua, que cuöc teyejyeya ompa ca nemejua, amo de embölde oyeya. ² Ma tequejtucö mösque

oyeya giente tiechtratörojque san petzotec ompa pa ciudad de Filipos (quieme nemejua nenquemajmate), mös ejqueu tiechchibelejque, pero Deus tiechyulchecöhualoöya. Ejqueu nemiechnunutzque de inu cuale tlamachestestelestle de Deus, mösque otiehcostöro meyac traböjo. ³ Pos cuöc tejua nemiechyuliehuaya para nemoneltocasque tieca Cristo, amo tecchijque porque tejua totlapolultejque, nimpor porque tecpeaya toyulo amo cuale, nimpor amo tecchijque ca tlacajcayöhualestle. ⁴ Cache seme tetlanunutztecate para que Deus quecualejtasque lo que tli tequejtoa. Pos yejuatzi tiechixnenebelejque hua tiechtlölejque quieme teencargödos de inu cuale tlamachestestelestle. Ejqueu tetlanunutzteja, amo para quecualejtasque giente, tlöcamo para ma quecualejtacö Deus, öque tiechixnenebeliluteca toyulo. ⁵ Pos quieme nemejua nenquemate, ayec tetlajtojque de nemejua ca tlajtulme cualtzetzi para nemiechcrajcayöhuasque. Cuale huölös yeca tli nemiechnunutzas cuöcualtzti para majcamo xecmatecö que yaja quetiemoa tomi. Tejua ayec tecchijque ejqueu. Deus quematihua de inu. ⁶ Nuyejque ayec tectiemojque yectieniebelestle de giente, cox de nemejua cox de ocseque giente, mösque cuale tecchihuasquiöne xecmachelicö tochecöhuales quieme tetlateotitlanme de Cristo. ⁷ Pero amo toconchijque inu, tlöcamo teyejyeya temöjos entre nemejua quieme pelantzetzli, noso quieme sente sohuatl tli modedicöroa quemixutea pelantzetzli de ocseque, pero cache ca meyac tlasojtelestle quemixutea tli ihuöxcahua.

Ejqueu tecchijque ca nemejua. ⁸ Porque tejua nemiechpilea meyac tlasojoesteleste, que hasta tecnejnequeya nemiechmöctisque amo sa cuale tlamachesteleste de Deus, tlöcamo nuyejque belaja tonemeles, pos nemiechtlaosojtlaya lalebes. ⁹ Pues nenquelnömequesque, tocnihua, quiene tontequetque ca meyac traböjo. Ca tunale hua ca yohuale tetejtequeteya para tetlacuösque. Pues amo tecnequeya ma tiechtlacualteja canajyeca de nemejua mientras nemiechnunutzaya de inu cuale tlamachesteleste de Deus.

¹⁰ Nemejua nenquemajmate, hua Deus nuyejque quematihuateca, que tejua tecchijque tlyectec hua mabestec ca nemejua tli nencreyentes, hua amo tecchijque niontle amo cuale. ¹¹ Pos nemejua nenquemate quiene tecchijque ca nemejua quieme sente tajtle quechihua ca ipelhua. ¹² Pos tejua nemiechmachtejque hua nemiechyuliejque ma xecchihuacö lo que tlin cuale, hua nemiechtlajtulmacaque xecchihuacö quiene nemiechconbenieroa ipampa de Deus nencate. Pos yejuatzi nemiechnutzalo para ma xecpeacö pörte ijtec tietlanienteles ompa cöne tlamandöruro.

¹³ Por inu tejua seme tetietlasojcömatelea Deus, pos cuöc nemejua nenquecajque inu tlajtule de Deus tli tejua nemiechnunutzque, nenqueselejque quieme tlajtule de Deus, hua amo quieme tlajtule de tlöca. Pos melöhuac yaja tlajtule de Deus, hua cuale niese lo que tli quechijteca pa nemoyulo de nemejua tli nencate nencreyentes. ¹⁴ Pos nemejua, tocnihua, cuöc inu gente de nemopuueblo nemiechtepotztoque, nemopa omochi quieme niecate grupos de creyentes ca Deus hua ca

Cristo Jesús tli cate ompa Judea. Porque joriojte quentepotztocaque inu grupos de creyentes de inpuueblo. ¹⁵ Inu joriojte tli amo creyentes, yejua tiemectejque toTlöcatzintle Jesús, ejqueu quieme oyeya quenmejnectejque inu tlawayulepantejque tli tlanunutzaya de pörte de Deus. Hua yejua joriojte tiechquextejque tejua de meyac pörtes. Deus amo quecualejtal lo que tli quechihua yejua. Hua yejua cate encuntra de noche ocseque giente, ¹⁶ porque amo tiechcöhua ma tequennunutzacö tli amo joriojte para ma momöquexticö yejua nuyejque. De inu maniera momeyaquelea intlajtlacul de inu joriojte. Pero ye lalebes meyac tiecualöneles Deus impa betzteca.

Pöbilo quenequeya quemejitas ocsajpa

¹⁷ Pero tejua, tocnihua, cuöc tocöjque por quiesque tiempo hua amo tojtaque, mösque seme toyulo nemiechpeaya totlac, tecnequeya lalebes teyösque para tojtasque. ¹⁸ Por inu tecpensörojque teyösque nemotlac. Naja nePöbilo ye ca ujpa necpensöro neyös. Pero amo otiechcö Satanás. ¹⁹ Pos ¿tli iyes lo que tli teccheasque, tli tiechmacas pöquelestle, ca tli tochamöhuasque ipa inun tunale cuöc hualiloas toTlöcatzintle Jesús hua teyesque tieixtla? Pos nemejua neny esque. ²⁰ Nemejua nencate nentochamöhuales hua nentopöqueles.

3

¹ Ejqueu noso, cuöc ayecmo tecxicojque de tönto tecpensöroöya de nemejua, tecpensörojque tocöhuasque tosiel necö Atenas. ² Hua tectitlanque tocni Timoteo, öque tieca Deus tequete de

inu tequetl de que tlanunutza de inu cuale tlamachestelestle de Cristo. Otectitlanque para ma cafirmöro nemoneltoqueles hua ma nemiechanimöro,³ para majcamo yeca nemiechcajcayöhua pa ini nöncate tunalte cuöc giente nemiechtepottocasque. Pos nenquemajmate que nöncat tocnupel, que giente amo tiechnequesque.⁴ Hua cuöc teyejyeya nemotzölö ye nemiechantesipörfejque de que tecsufrirusque. Hua ejqueu omochi, quieme nenquemajmate.⁵ Por inu naja, cuöc ayecmo necxicoöya, nectitla Timoteo nemotlac para necmates tlö oc turavea nemoneltoca cuale. Pos nomajtiöya de que inu tieyulmajmötocane cana ye nemiechyulmajmötocac, hua totraböjo amo tli oserbirebesquea.

⁶ Öxö, ye onasecö Timoteo de Tesalónica, cöne nemejua nencate. Hua quebicatz cuale tlamachestelestle de nemoneltoqueles hua de nemotlasojetes. Tiechelfe que seme nentiechelnömeque ca tlasojetestle hua que nenqueneque lalebes nentiechejtasque, ejqueu quiename tejua nuyejque tecnejneque nemiechejtasque.⁷ Por ini nöncat, tocnihua, mösque giente tiechtlayelejtaya hua tiechcocoöya tocuiero, pero toyulsiebiöya lalebes cuöc tejcajque quiene nemoneltoca.⁸ Seme toscalea cuöc tejcaque que nenchecöjtecate tieca Tlöcatzintle.⁹ ¿Quiene noso cuale tetietlasojcömatelisque toDeus por nemejua hua por noche inu pöquelestle tli tecpejpea tieixtla Deus por nemejua?¹⁰ Yohualen tunale tetietlötlathea lalebes para ma tiechcöhuacö

para nemiechejtatibe ocsajpa. Pos tecneque tecseñcohua que lo que tli oc polebe para ma xeyecö intiero nencualteque de nemoneltoqueles.

¹¹ Öxö, mismo Deus toTajtzi hua Tlöcatzintle Jesús ma tiechpaliebicö para cuale teyösque ca nemejua. ¹² Tlöcatzintle ma nemiechmeya que licö hua cache hua cache nemiechmacacö neltoquelestle hua tlasojtelestle, para ma uye inu tlasojtelestle entre nemejua hua nuyejque ca oce que giente, ejqueu quiename tejua nemiechpilea inu tlasojtelestle ca nemejua. ¹³ Ma nemiechmacacö fuiersa ipa nemoyulo para que nenyesque nenyecteque, sin niontle de amo cuale, tieixtla Deus toTajtzi, cuöc hualiloas toTlöcatzintle Jesús ca noche giente tli tiehuöxcahua.

4

Quiene conbenierebe öque nemes para quecualejtasque Deus

¹ Öxö, nocnihua, nemiechtajtlanelea hua nemiechtlötajtea tietucöyupantzincó Tlöcatzintle Jesús, xecsequirucö hua xecchijtacö cache hua cache lo que tli nemiechejtetejque, quiename ye nenquechijtate. Pos tejua nemiechejtetejque quiene conbenierebe öque nemes para que ejqueu Deus quecualejtasque.

² Nemejua nenquemajmate lo que tli nemiechtajtulmacaque por tiechecöhuales de toTlöcatzintle Jesús. ³ Pues yaja ini nönca lo que tli quenequihua Deus, que nemonemeles ma iye yec tec. Quenequihua majcamo yeca mopajpöcte ca oce que sohuame tlöcamo solamente ca tli

isohua. ⁴ Ejqueu noso, cara sente ma momachte * quepeas isohua de sente maniera yectec hua ca meyac respieto. ⁵ Majcamo queliebe lo que tli amo cuale, quiename queliebea ocseque giente que amo tieixomate toDeus. ⁶ Majcamo yeca tlajtlaco hua majcamo maprovechöro de sente icni pa ini nönca asunto. Pos toTlöcatzintle quencastecörurus checöhuac innochtie tli quechihua inu sösantle, quiename ye nemiechantesipörfejque hua nemiechtlajtulmacaque. ⁷ Pues Deus amo tiechixpejpenque para ma tenemecö ipa petzoyutl, tlöcamo quenequihua ma iye yectec tonemeles. ⁸ Por inu, öque amo queneltoca inu nieca tlamachestelestle, amo tieneltoca Deus. Pos inu nieca machestelestle amo yebitz de tlöca tlöcamo de Deus, öque tiechmacalo tieEspíritu öque yectec iloac.

⁹ Pero de inu tlasojtelestle para tocnihua, ¿tli para nemiechejcuelfis de inu? Pos Deus ye nemiechmachestiluteca para que ye nemotlasojtlatecate entre nemejua. ¹⁰ Pos ejqueu ye nenantlasojtla innochtie tocnihua tli chajchönte pa noche estado de Macedonia. ¹¹ Pero nemiechtlötlajtea, nocnihua, que nemotlasojteles ma momeyaquele cache. Hua xecnequecö nenenmesque ca cuale hua ca siebelestle. Hua *amo xecalaquecö ipa asuntos tli amo nemohuöxcahua. Hua xeyectequetecö, quiename tejua nemiechtlajtulmacaque. ¹² Ejqueu xenemecö quiene conbnierebe imixtla ocseque giente, pos ejqueu amo

* **4:4** Cuale nuyejque motradusirus: “quemalfis icuierpo”.

* **4:11** Cuale nuyejque motradusirus: “xomodedicörucö pa nemo-traböjo”.

nemiechpolus niontla.

Hualiloas toTlöcatzintle

¹³ Tocnihua, tecneque ma xecmatecō de niecate tli omejmejque, para majcamo xomoyulcocucō quiename moyulcocoa ocseque gente tli amo quepejpea nemöchealestle. ¹⁴ Pos toneltoca que Jesús omecoac hua sötiepa oyulebihuac. Hua ejqueu mismo toneltoca que niecate tli monel-tocaque tieca Jesús hua ye omejmejque, Deus quechihuasque ma huölöcō tieca Jesús.

¹⁵ Pos nönca tli tejua nemiechelfea ica tietlajtultzi Tlöcatzintle, que tejua tli oc turavea tenejneme hua tocöhucasque hasta cuöc hualiloas Tlöcatzintle, tejua amo tetlayecönasque antes de niecate tli omejmejque. ¹⁶ Porque Tlöcatzintle mismo temoas de elfecac, hua tiechtzajtzelisque ca itlajtul de inu arcöngel, tli ica capetö de ocseque öngeles, hua ca inu tlapitzale de Deus. Entunses niecate tli monel-tocaque tieca Cristo hua omejmejque, yejua yulebesque cachto. ¹⁷ Sötiepa tejua tli oc turavea tenejneme tiehbicasque inhua tli ye yojyulejque. Hua tetlejcusque itzölö mextle para tetienömequesque Tlöcatzintle ompa tlacpac. Ejqueu teyesque ca Tlöcatzintle nochepa. ¹⁸ Xomoyuliehuacō noso entre nemejua ca nöncate tlajtulme.

5

¹ Pero, ¿tli para nemiechejcuelfis de tunalte o noso ura que pasörebes ini nönca? ² Pos nemejua ye nenquemate cuale que inu tunale de toTlöcatzintle ases sin que amo öque quemates quiema yebitz, quiename cuöc yebitz sente

tlachtejque ca yohuale. ³ Cuöc giente quejtojtasque: “Noche icaca cuale, hua onca siebelestle”, entunses sa sie repiente impa huölös tlaxexetunelestle hua mequelestle. Iyes quiename cuöc sente sohuatl ica utztle, hua sa sie repiente yebitz inu tiecoco de que quetlöcatelis peltzintle. Hua de inu tlaxexetunelestle abele cholusque giente. ⁴ Pero nemejua, tocnihua, amo nencate ijtec tlajtlayohuaquelestle, para que inu tunale de toTlöatzintle majcamo nemiechnöhualase quieme cuöc tlanöhualase sente tlachtejque. ⁵ Pos nemonochtie nencate de tlöbile hua de ca tunale. Tejua tli tecreyentes amo tecate de ca yohuale nimpor amo tecate de tlajtlayohuaquelestle. ⁶ Por inu majcamo tecojcochtacö quiename osseque giente cojcoche. Cache ma teyectlajt-lachixtacö hua ma tecyecpensörojtacö. Majcamo tecpensörojtacö quieme tlajtlöhuönkötzetzi. ⁷ Pos tli cojcoche, cojcoche ca yohuale, hua tli tlajtlöhuöna, tlajtlöhuöna ca yohuale. ⁸ Pero tejua tli tecate de ca tunale, seme ma cuale tecyecpensörojtacö. Ma toixuticö ca toneltoqueles hua totlasojeles, quiename sente soltöro mixutea ca itlaquie de tepostle ipa ipiecho. Hua ma techixtacö de que Deus tiechmöquextisque. Inu nemöchealestle iyes quiename icöscö de tepostle ca tli quixutea itzonteco soltöro. ⁹ Pos Deus amo tiechixpe-jpenque para tiechcastecörusque, tlöcamo para ma tecpeacö nemöquextelestle por toTlöatzintle Jesucristo. ¹⁰ Yejuatzi Jesucristo omecoac por tejua para que tonochtie ma tenemecö tiehuantzinco, ya sea cox tenentecate cuöc hualiloas, noso cox ye otomezmejque. ¹¹ Por inu, xomoyuliehuacö hua

xomoyulchecöhuacö entre nemejua, quiename ye
nenquechijtecate.

Consiejos

¹² Nemiechtlötlajtea, tocnihua, xequemejtacö
niecate tli tejtequete nemotzölö hua
nemiechyecöna hua nemiechtlajtulmaca ti-
etucöyupantzincó Tlöcatzintle. ¹³ Xequenyequejtacö
hua xequentlasoxtlacö lalebes, por intequetli
quechijtecate. Ma seme uye siebelestle entre
nemejua.

¹⁴ Nuyejque nemiechtlajtulmaca, tocnihua,
xequemelficö niecate tli amo quenejneque
tejtequetesque, que majcamo quetlatzebelicö.
Xequenyuliehuacö niecate tli amo quenejneque
quesequirusque. Xequenpaliebicö niecate
tli quenpoloa checöhualestle. Xequenxicucö
innochtie ca pacienza.

¹⁵ Tlö canajyeca nemiechchibelea yetla amo
cuale, xecpeacö cueröro majcamo xejcuepelicö ca
tli amo cuale, tlöcamo xecchihuacö seme tlin cuale
entre nemejua hua nuyejque ca ocseque gente.

¹⁶ Seme xepöctacö. ¹⁷ Seme xomotlötatlajejtacö.
¹⁸ Xetietlasojcömatelicö Deus ipa noche sösantle tli
nemiechpasöroa, pos yaja ini nönca lo que tli Deus
quenequihua ma xecchihuacö nemejua tli nen-
cate tieca Cristo Jesús.

¹⁹ Amo xectzacuelicö lo que tli Espíritu de Deus
quenequihua quechihuasque. ²⁰ Amo xecdespre-
siörucö lo que tli quejtoa tlayulepantejque cuöc
tlajtlajtoa de pörte de Deus. ²¹ Pero xecprobörucö
noche sösantle tli nenquecaque, hua xomocöhuacö

ca lo que tlin cuale. ²² Xomomalficö de noche
sösantle tli amo cuale.

²³ Deus mismo, öque tiechmacalo yulsiebellestle, ma nemiechyectelicö intiero cuale, hua ma nemiechixuticö para quemalfisque nemoyulo hua nemoölma hua nemocuierpo para que amo nemiechpolus niontle hua amo nenquepeasque niontle de amo cuale ipa nemonemeles cuöc hualiloas toTlöatzintle Jesucristo. ²⁴ Yejuatzi öque nemiechnutzque iloac de confiönsa, hua quechi-huasque ini nönca sösantle.

Tlapalulestle

²⁵ Tocnihua, xomotlajtlötlajticö por tejua nuye-jque.

²⁶ Xequentlapalucö innochtie tocnihua ca sente petzulestle de yectelestle.

²⁷ Nemiechencargörfea tietucöyupantzincō Tlöatzintle xectlajtulticö nönca cörta ca innochtie tocnihua.

²⁸ Tiefavur de toTlöatzintle Jesucristo ma iye ca nemejua.

**El Nuevo Testamento en nahuatl de
Tetelcingo**
New Testament in Nahuatl, Tetelcingo
(MX:nhg:Nahuatl, Tetelcingo)

copyright © 1980 Wycliffe Bible Translators, Inc.

Language: Nahuatl, Tetelcingo

Translation by: Wycliffe Bible Translators, Inc.

Náhuatl, Tetelcingo [nhg], Mexico

Copyright Information

© 1980, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nahuatl, Tetelcingo

© 1980, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

**PDF generated using Haiola and XeLaTeX on 11 Nov 2022 from source files
dated 29 Jan 2022**

03771ce6-e402-5a23-8b38-f25c82864faf